

D.R. 20/94

Naskhah Sahih—B. Kebangsaan

**RANG UNDANG-UNDANG ASKAR TIMBALAN
SETIA NEGERI JOHOR (PEMBUBARAN DAN
PEMANSUHAN) 1994**

SUSUNAN FASAL

Fasal

1. Tajuk ringkas dan mula berkuatkuasa.
2. Tafsiran.
3. Pembubaran Askar Timbalan Setia Negeri Johor.
4. Anggota Askar disifatkan telah ditauliahkan atau didaftarkan.
5. Anggota Askar disifatkan telah bersara.
6. Peletakhakan harta.
7. Bayaran yang kena dibuat di bawah apa-apa perkiraan kewangan.
8. Pemansuhan Enakmen.
9. Penerusan prosiding jenayah dan sivil.

RANG UNDANG-UNDANG

bernama

Suatu Akta untuk mengadakan peruntukan bagi pembubaran Askar Timbalan Setia Negeri Johor dan pemansuhan Enakmen Askar Timbalan Setia Negeri Johor 1915 dan untuk mengadakan peruntukan bagi perkara-perkara yang berhubungan dengan pertauliahkan dan pendaftaran ke dalam angkatan tentera Malaysia, dan persaraan, anggota tertentu Askar Timbalan Setia Negeri Johor dan juga bagi perkara-perkara lain yang berkaitan dengannya.

[]

MAKA INILAH DIPERBUAT UNDANG-UNDANG oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

1. (1) Akta ini bolehlah dinamakan Akta Askar Timbalan Setia Negeri Johor (Pembubaran dan Pemansuhan) 1994. Tajuk ringkas dan mula berkuatkuasa

(2) Akta ini hendaklah mula berkuatkuasa pada tarikh yang ditetapkan oleh Menteri melalui pemberitahuan dalam *Warta*.

2. Dalam Akta ini, melainkan jika konteksnya menghendaki makna yang lain— Tafsiran.

"anggota Askar" ertinya pegawai dan soldadu Askar Timbalan Setia Negeri Johor;

"angkatan tentera" hendaklah mempunyai erti yang diberi kepadanya di bawah Akta Angkatan Tentera 1972; Akta 77

"angkatan tetap" hendaklah mempunyai erti yang diberi kepadanya di bawah Akta Angkatan Tentera 1972;

En.No 31. "Enakmen" ertinya Enakmen Askar Timbalan Setia Negeri Johor 1915;

"harta" termasuklah persenjataan;

"Kerajaan Negeri" ertinya Kerajaan Negeri Johor;

"Majlis Angkatan Tentera" ertinya Majlis yang ditubuhkan di bawah Perkara 137 Perlembagaan Persekutuan;

"Menteri" ertinya Menteri yang dipertanggungjawabkan dengan tanggungjawab bagi pertahanan;

"tarikh ditetapkan" ertinya tarikh yang ditetapkan oleh Menteri di bawah subseksyen 1(2).

Pembubaran
Askar
Timbalan
Setia Negeri
Johor.

3. Pada tarikh ditetapkan, Askar Timbalan Setia Negeri Johor hendaklah dibubarkan dan anggota Askar hendaklah pada tarikh itu diberhentikan daripada perkhidmatan.

Anggota
Askar
disifatkan
telah
ditaullahkan
atau
didaftarkan.

4. (1) Walau apa pun apa-apa jua yang terkandung dalam Akta Angkatan Tentera 1972, anggota Askar yang sebelum sahaja tarikh ditetapkan telah, dengan kelulusan Yang di-Pertuan Agong, diberi opsyen oleh Majlis Angkatan Tentera untuk berkhidmat dalam angkatan tentera dan telah menerima opsyen itu hendaklah pada tarikh ditetapkan disifatkan telah ditauliahkan atau didaftarkan dalam angkatan tetap mengikut peruntukan Akta Angkatan Tentera 1972.

(2) Anggota Askar yang disebut dalam subseksyen (1)–

- (a) hendaklah ditauliahkan atau didaftarkan untuk berkhidmat dalam angkatan tentera atas terma dan syarat perkhidmatan yang tidak kurang baiknya daripada terma dan syarat perkhidmatan yang anggota itu berhak kepadanya sebelum sahaja tarikh ditetapkan; dan

ASKAR TIMBALAN SETIA NEGERI JOHOR 5
(PEMBUBARAN DAN PEMANSUHAN)

- (b) tidak boleh dikehendaki untuk berkhidmat dalam angkatan tetap bagi suatu tempoh yang lebih panjang daripada tempoh yang baginya anggota itu dikehendaki untuk berkhidmat dalam Askar Timbalan Setia Negeri Johor.

(3) Seksyen ini tidak terpakai pada anggota Askar yang berkhidmat di bawah suatu kontrak pekerjaan atau yang di bawah Enakmen adalah atau melebihi umur persaraan sebelum sahaja tarikh ditetapkan.

5. (1) Walau apa pun apa-apa jua yang terkandung dalam Akta ini, anggota Askar yang telah melaksanakan opsyen untuk bersara daripada perkhidmatan Askar Timbalan Setia Negeri Johor hendaklah pada tarikh ditetapkan disifatkan telah bersara di bawah perenggan 10(5)(b) Akta Pencen 1980.

Anggota Askar disifatkan telah bersara.

Akta 227,

(2) Anggota Askar yang disebut dalam subseksyen (1) hendaklah dibayar faedah persaraan sebagaimana diperuntukkan di bawah subperaturan 4(2) Peraturan-Peraturan Pencen 1980.

P.U. (A) 176/80.

6. (1) Segala harta dan aset selain daripada harta tak alih yang sebelum sahaja tarikh ditetapkan adalah terletak pada, atau dalam milikan atau di bawah kawalan atau dipegang bagi pihak, Askar Timbalan Setia Negeri Johor bagi maksud pertahanan hendaklah, pada tarikh ditetapkan dan tertakluk kepada Akta ini, terletak pada Kerajaan Persekutuan.

Peletakhakan harta.

(2) Kerajaan Persekutuan boleh, selepas berunding dengan Kerajaan Negeri, melantik suatu Jawatankuasa Bersama—

- (a) untuk membahagikan, dalam hal keraguan, antara Kerajaan Persekutuan dan Kerajaan Negeri apa-apa harta atau aset yang terletak pada Askar Timbalan Setia Negeri Johor dengan niat bahawa harta atau aset yang

dikehendaki bagi maksud Kerajaan Persekutuan hendaklah dibahagikan kepada Kerajaan itu dan bahawa harta atau aset yang dikehendaki bagi maksud Kerajaan Negeri hendaklah dibahagikan kepada Kerajaan itu; atau

- (b) untuk membahagikan, dalam hal keraguan, harta atau aset itu kepada mana-mana pegawai yang berkenaan bagi apa-apa maksud mengikut kehendak keadaan.

Bayaran yang
kena dibuat
di bawah
apa-apa
perkiraan
kewangan.

7. (1) Kerajaan Persekutuan hendaklah membayar kepada Kerajaan Negeri apa-apa bayaran wajar yang kena dibuat menurut apa-apa perkiraan kewangan yang dipersetujui antara Kerajaan Persekutuan dan Kerajaan Negeri berkenaan dengan peletakhakan harta dan aset pada Kerajaan Persekutuan yang disebut dalam seksyen 6.

(2) Semua bayaran wajar yang kena dibuat di bawah subseksyen (1) hendaklah dipertanggungkan ke atas Kumpulan Wang Disatukan Persekutuan.

Pemansuhan
Enakmen.

8. (1) Enakmen dan semua perundangan subsidiari yang dibuat di bawahnya adalah dimansuhkan.

(2) Pemansuhan di bawah subseksyen (1) itu tidak—

- (a) menyentuh penguatkuasaan terdahulu, atau apa-apa jua yang dilakukan atau dibiarkan dengan sewajarnya di bawah Enakmen, atau mana-mana perundangan subsidiari yang dibuat di bawahnya;
- (b) menyentuh apa-apa hak, hakmilik, kepentingan, kebebasan, keistimewaan, obligasi atau liabiliti yang diperolehi, terakru atau dilakukan di bawah Enakmen atau mana-mana perundangan subsidiari yang dibuat di bawahnya; dan
- (c) menyentuh hak-hak anggota Askar kepada apa-apa pencen, ganjaran atau faedah lain di bawah mana-mana undang-undang bertulis yang lain yang berhubungan dengan perkara itu.

ASKAR TIMBALAN SETIA NEGERI JOHOR 7
(PEMBUBARAN DAN PEMANSUHAN)

9. (1) Tertakluk kepada Akta ini, pemansuhan Enakmen atau apa-apa jua yang terkandung dalam Akta ini tidak boleh menyentuh liabiliti mana-mana orang untuk didakwa, dihadapkan ke mahkamah tentera atau dihukum bagi kesalahan yang dilakukan di bawah Enakmen sebelum hari ditetapkan, atau apa-apa prosiding yang dibawa atau hukuman yang dikenakan sebelum hari itu berkenaan dengan kesalahan itu.

Penerusan
prosiding
jenayah dan
sivil.

(2) Tertakluk kepada Akta ini, mana-mana prosiding (sama ada jenayah atau sivil) atau kausa tindakan yang belum selesai atau yang ada sebelum sahaja hari ditetapkan oleh atau terhadap mana-mana orang yang bertindak bagi pihak Askar Timbalan Setia Negeri Johor boleh diteruskan atau dimulakan oleh atau terhadap Kerajaan Persekutuan sebagaimana ia boleh diteruskan atau dimulakan oleh atau terhadap orang itu jika Akta ini tidak diluluskan.

HURAIAN

Rang Undang-Undang ini bertujuan mengadakan suatu Akta baru yang disebut sebagai "Akta Askar Timbalan Setia Negeri Johor (Pembubaran dan Pemansuhan) 1994" ("Akta") untuk mengadakan peruntukan bagi pembubaran Askar Timbalan Setia Negeri Johor dan pemansuhan Enakmen Askar Timbalan Setia Negeri Johor 1915. Rang Undang-Undang ini juga bertujuan mengadakan peruntukan bagi perkara-perkara mengenai opsyen yang dilaksanakan oleh anggota Askar Timbalan Setia Negeri Johor serta perkara-perkara lain yang berkaitan dengannya.

2. *Fasal 1* memperkatakan tajuk ringkas dan bertujuan membenarkan Menteri menetapkan tarikh berkuatkuasanya Akta.

3. *Fasal 2* mentakrifkan perkataan dan ungkapan tertentu yang digunakan dalam Akta.

4. *Fasal 3* bertujuan mengadakan peruntukan bagi pembubaran Askar Timbalan Setia Negeri Johor pada tarikh yang ditetapkan oleh Menteri.

5. *Fasal 4* memperkatakan tentang anggota Askar Timbalan Setia Negeri Johor yang telah memilih untuk berkhidmat dengan angkatan tentera Malaysia. Ia menyatakan dengan jelas bahawa pertauliah dan pendaftaran anggota itu ke dalam angkatan tentera Malaysia hendaklah atas terma dan syarat perkhidmatan yang tidak kurang baiknya daripada apa yang mereka berhak kepadanya di bawah Enakmen.

6. *Fasal 5* memperkatakan tentang anggota Askar Timbalan Setia Negeri Johor yang telah memilih untuk bersara daripada perkhidmatan Askar. Ia menyatakan dengan jelas bahawa anggota itu hendaklah dibayar faedah persaraan yang sesuai di bawah Peraturan-Peraturan Pencen 1980.
7. *Fasal 6* bertujuan menyatakan bahawa segala harta dan aset Askar Timbalan Setia Negeri Johor hendaklah terletak pada Kerajaan Persekutuan. Bagaimanapun, dalam hal keraguan, Kerajaan Persekutuan boleh, selepas berunding dengan Kerajaan Negeri, menubuhkan suatu Jawatankuasa Bersama untuk memutuskan mengenai pembahagian harta atau aset itu.
8. *Fasal 7* bertujuan mengadakan peruntukan bagi bayaran yang kena dibuat di bawah apa-apa perkiraan kewangan antara Kerajaan Persekutuan dan Kerajaan Negeri berkenaan dengan peletakkan harta dan aset pada Kerajaan Persekutuan.
9. *Fasal 8* bertujuan memansuhkan Enakmen dan semua perundangan subsidiari yang dibuat di bawahnya.
10. *Fasal 9* bertujuan mengadakan peruntukan bagi penerusan prosiding jenayah dan sivil walaupun Enakmen dimansuhkan.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN. (U²) 1789.]